

ԺԴ

ՊԱՐՈՆ-ԼՈՅՍ ՆՈՐ ՆԱՀԱՏԱԿ

Քեզ երանի՛ կաֆա քաղաք,
Զի նոր նըշան քեզ երեւի.
Քոյ քահանայքըն ժողովին՝
Տաւնեն ըզտաւն Պարոն-Լուսին:
Սուրբ Պարոն-Լոյս քեզ երանի՛,
Եւ քո զարմիցն որ ի մարմնի.
Դու Քրիստոսի վըկայ եղեր,
Պարծանք Հայոց տանս Արմենի:
Այս մըթացեալ ժամանակի
Դու լոյս եղեր մէջ աշխարհի,
Եւ սառնացեալ ձմերայնի
Վարդ և շուշան մէջ պարտիգի:

Ո՞վ էր այն երջանիկ նահատակը, որոյ տարաժամ
և նախանձելի անմահութիւթ մահը այս սրտաշարժ
տողերով կը դրուատէր մեզմէ երեք դար և աւելի
յառաջագոյն Վրթանէս անունով վարդապետն «յե-
տինս ի Քարողողաց¹» ինչպէս ինքզինքը կ'անուա-
նէ, որ տեսող և սքանչացող էր հանդիսի նահա-
տակութեանն, զմարմինն «անմաքուր բազկաւ իմով
դրկեցի և եղի ի տապանի»:

1. Անշուշտ ի կարգէ հայ Դոմէնիկեան միանձանց, որ
բազմաթիւ էին ի ժամանակին ի թերակղզւոյ Տաւրիոյ: